

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Bon bini na november, penúltimo luna di 2018. Aña a bula pasa atrobe ku un spit haltu. Pero nos ta kontentu ku bo ta habri november riba nos Plenchi di Skol. Bon bini..yega serka pa nos por interkambiá riba diferente tópiko.

Awor si nos ta kuminsá saka tur adorno di sinterklaas i di pasku for di baul, paso mester kuminsá dòrna pa e témporada mas bunita di aña. Bo sa kaba kon bo ta bai duna un toke festivo, navideño na bo kas, ofisina of klas? No tin mester di kosta sen, ku palu den kurá bo por traha bo mes palu di pasku. Ku palèt of pida pida palu bo por traha bo palu original i kreativo. Laga bo yunan of muchanan yudabu. No ta bai pa e palu ta perfekto, ta bai pa sinta huntu komo famia i pensa kiko i kon por ta kreativo sin saka sèn. Pensa papia i plania pa despues tur wikènt boso traha huntu na e ambiente. Traha huntu riba un proyekto ta trese harmonia i un ambiente dushi. Usa bo telefon pa buska ideanan diferente pa inspirabu.

Awe nos ta trese st. Paulus VSBO den lus, pa boso. Disfrutá di nos plenchi i disfrutá di e wikènt.

Riba roster

VSBO / AGO St. Paulus

VSBO/AGO St. Paulus ta kai bou di enkargo di Direktiva di Skolnan Katóliko. E ta un skol ku posibilidatnan amplio i ta ofresé e komunidad di Kòrsou dos tipo di enseñansa, esta VSBO i AGO. Tur e dos tipo di enseñansanan akí ta prepará e alumnonan di VSBO pa sigui un estudio na SBO (nivel 2, 3 i 4) i Havo. Tambe ta prepará e alumnonan di AGO pa e merkado laboral, òf nan por sigui tambe un estudio na SBO nivel 1. E enseñansa ku nos ta ofresé kada alumno ta di tal forma ku e por desaroyá su mes optimalmente. Tur e aktividatnan ofresé durante henter aña skolar na e alumnonan ta pa nan por desaroyá abilidadnan di siglo 21, konosementu i aktitut. Asin'aki e alumnonan ta haña un bon preparashon i por kumpli ku e eksigensianan di e komunidad modèrno.

VSBO

VSBO tin un durashon di 4 aña, di kua e dos promé añanan ta un formashon básiko i den aña 3 i 4 e alumnonan por sigui ku e sektor ku nan a skohe. Ta asina ku na final di aña dos, e alumno ta hasi un eskoho a base di su prestashon i interes. Pa motibu ku kada alumno ta siña na un manera diferente, nos ta ofresé nan un mihó manera ku ta pas ku nan desaroyo personal. VSBO konosé tres nivel di enseñansa: (1) Theoretische Kadergerichte Leerweg (TKL), (2) Praktische Kadergerichte Leerweg (PKL), en (3) Praktische Basisgerichte Leerweg (PBL).

VSBO St. Paulus ta un skol di aña 3 i 4 kaminda e alumnonan, por sigui e sektornan di téknika i ekonomia. E sektor di téknika ta konsistí di e siguiente programanan: (1) Téknika General, (2) Konstrukshon, (3) Metal i (4) Instalashon eléktriko. E sektor di ekonomia tin e programanan di Atministrashon i Komèrsio.

Nos alumnonan ku ta sigui e nivel di siñansa práktiko (PKL & PBL) ta haña un kombinashon di teoria i práktika. E alumnonan tin ku bai un periodo di prueba na un empresa pa orientá nan mes. Durante di e periodo akí e desaroyo di un bon aktitut di trabou i haña konosementu di e trabou ta pará sentral. Durante di e lèsnan di práktika na skol, e alumnonan ta haña tareanan práktiko i realístiko pa asina nan por mira e konekshon di teoria i práktika mas fásil.

Alumnonan ku ta sigui e nivel di siñansa teorétiko (TKL) no ta haña práktika ni nan no tin ku hasi un periodo di prueba. Pero nan ta traha ku proyektonan kaminda nan ta trein kon: solushoná problema, komuniká, presentá, pensa krítiko i traha den tim.

ektor	Programa di sektor	Nivel di siñansa
Téknika	(1)Téknika General (2)Konstrukshon, (3) Metal, (4) Instalashon eléktriko	TKL PKL i PBL
Ekonomia	(1) Atministrashon i Komèrsio	TKL i PKL

Tèknika

Tèknika ta un parti importante den nos komunidad tantu riba nivel lokal komo internashonal. Konstantemente empresanan ta en buska di personal tèkniko.

Tèknika General

Den e programa di e sektor Tèknika General e alumnonan ta siña abilidad manera: komunikashon, inkorporashon di informashon, trahamentu independiente, huntu i yega na solushon. Durante di e programa e alumnonan ta haña un bista amplio riba tèknika. Nan ta siña tur e tèknika di vehíkulo ku motor, tèknika di konstrukshon, tèknika di metal i instalashon eléktriko. Nos alumnonan ta traha nan tareanan den grupito. E tareanan ta tokante inovashon, resiklahe i problemanan tèkniko diario.



Tèknika di Konstrukshon

Den e programa di e sektor di konstrukshon nos alumnonan ta siña tur loke nan mester sa ora ta bai traha un kas, edifisio for di fundeshi te ku dak. Nan ta siña tambe tèknikanan riba tereno di diseñá, traha ku palu manualmente/ku mashin i tèknika di un karpinté.





Téknika di Metal

VSBO St.Paulus ta e úniko skol na Kòrsou ku ta ofresé alumnonan e téknika di metal. Den e sektor akí e alumno ta siña traha ku mashin i hèrmèn pa asina e por prosesá e metal i e material sintétiko.



Pa motibu ku nos alumnonan ta siña diferente abilidadat manera: feila, bora, drai, las, tap, freeze i sòlder, nan por harma/monta obra masha bon mes. Bo por mira kon nan a hasi uso di tur e téknikanan ku nan a siña.



Den e programa di téknika di metal nos alumnonan ta siña diseña tambe. Manualmente i tambe digital, nan ta siña pinta 3d ku un programa di cad. Asin'aki e alumnonan ta siña diseña nan propio pintura i bai trah'é tambe den práktika.

Instalashon eléktriko

Na VSBO St.Paulus tin tambe e programa di e sektor Instalashon eléktriko. E programa ta masha amplio. E ta konsistí di e materia elektrotéknika i e materia di téknika di instalashon.

Den e parti di elektrotéknika e alumnonan ta siña kon pa pone koriente den un bibienda i nan ta siña tambe e prinsipionan básiko di elektrónika, téknika di energia i outomatisashon. Ku e programa di cad proficad nos alumnonan ta siña traha pintura i pinta skema digitalmente.




Den téknika di instalashon ta trata: téknika di pasa pipa di awa, téknika sanitario, téknika di kloaka i téknika friu.



Sektor di ekonomia

Atministrashon i komèrsio

E sektor Atministrashon i Komèrsio ta amplio. E alumnonan ta haña idea di e atministrashon di empresanan manera: logístika, sekretariado, trabounan atministrativo i komersial. E programa di sektor na nos skol ta riba nivel di TKL i PKL.



E alumnonan ta siña e trabou di bendedó, kumpradó, trahadó den depósito/magazein. Nan ta siña tambe detayadamente kon pa instalá un

tienda efisientemente hasiendo uso di instrumèntnan di merkadeo. Durante di e lèsnan di práktika e alumnonan ta siña kon pa ordená un depósito/magazein di tal forma ku nan por haña e artíkulonnan sistemátikamente bèk.

Nan ta siña tambe trabou di frontoffice i backoffice manera: hisa telefòn, atministrá agènda, traha relato, manda pòst i risibí bishita.

Empresa chikí

Pa stimulá e abilidadnan ariba menshoná, VSBO St. Paulus ta partisipá tur aña na e proyekto empresa chikí. Empresa chikí ta un proyekto internashonal i akí na Kòrsou Fundashon Negoshi Pikiña tin esei bou di su enkargo.. E meta di e proyekto ta pa stimulá alumnonan pa ta empresarionan independiente. Nan mester presentá un produkto ku nan mes a traha. E alumnonan ta forma un empresa chikí ku un grupito di kuater persona. Ta inskribí e empresa chikí akí na Kámara di Komèrsio. Durante di e proseso e alumnonan ta bini ku un plan pa e empresa, ta hasi un investigashon di merkado, ta bende nan produkto, tene buki i hasi atministrashon. Di e manera akí e alumnonan ta haña oportunitat amplio pa desaroyá nan talentonan.

Klasnan ku ta haña sosten èkstra individualmente (GEO)

Pa alumnonan ku tin mester di sosten èkstra, nos tin e klasnan di GEO riba nivel di PBL, den e sektornan di konstrukshon i metal. Ta yuda menguá e problemanan ku e alumnonan tin riba tereno di siñamentu, problema sosial emoshonal i problema den nan komportashon. Den koperashon ku Sentro pa Inovashon i Guia Edukashonal(SIGE) nos ta duna e alumnonan akí e sosten èkstra ku nan tin mester. Ta pa e motibu akí tin solamente 16 alumno den un klas di GEO.

Mucha djispou

Yufrou: Gino, si mi bisa “mi tabata riku”ta pasado. Si mi bisa mi ta kontentu ta kiko esei?

Gino: Esei ta puru fantasia.